

Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.415








Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.415





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.415




Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.415




1. 6. 415



















43

FREDERICI  
SCHERERTZII  
MEDITATIONES  
DE  
RECTA  
PHILOSOPHIA.


*Quibus ad illam restaurandam verum  
continetur consilium.*



LVGDVNI BATAVORVM  
Apud PETRUM HACKIVM

clō 13 c lxii.





4  
NOBILISSIMO, AMPLIS-  
SIMO, LITTERATISSI-  
MOQUE VIRO  
D<sup>o</sup>. JOANNI COPELIO,  
EQUITI, JURISCON-  
SULTO, SERENISSIMI  
ELECTORIS BRAND-  
ENBURGENSIS MI-  
NISTRO STATUS, ET  
CONSILIARIO INTI-  
MO, ATQUE APUD IL-  
LUSTRISSIMOS FOE-  
DERATI BELGII OR-  
DINES RESIDENTI  
ORDINARIO

FREDERICUS SCHERERTZIUS.

**P**hilosophiam Amplitudini tue recom-  
mendo, Nobilissime vir, rectam illam,  
& genuinam cæli prolem. Amari hæc  
\* 2 cupit



cupit ab omnibus, & protegi, omnibus exposita  
& benigna, originis suæ verum exemplar. Ama-  
tor ejus es, sis, obsecro, & ejus protector. Scis sa-  
crum nomen, divam virtutem, addere debeo a-  
cerbum, magnam calamitatem. Res ampliori pe-  
titione non indiget, nisi mei causa, quem auda-  
cem excuses velim, & assumas. Non diffido, justi-  
tiæ namque consul & antistes hunc meum æquum,  
& honestum sermonem, quem pro veritate medi-  
tatus sum, facile admittes. Negotium fidei geri-  
tur, qua obligati sumus omnes rerum universita-  
ti, quam intelligere volunt mortales duce hac ma-  
gistra, & quæ stare ingenium docet, non tituba-  
re, non cadere. sed an fingenda alia? an mu-  
tanda facies pulcerrimæ & divinæ? Minimè. Fu-  
giant poëtæ, & pictores illi hanc libertatem, inju-  
riosam, & noxiam. Factor unus est, bonus, & maxi-  
mè potens, colendus ille, non corrigendus. Ima-  
go operis ejus à nobis exprimenda? fiat hæc cum  
cura, & sollicitè. Duxit is lineas manu purissima,  
quæ nequit errare. Sumus ejus servi, ad omne ob-  
sequium parati. Cognoscamus artificem, sequa-  
mur veritatem, verum exprimamus simulacrum.  
Aliorum opinione non opus, nec consuetudine,  
dira etenim hæc esse solent, maligna, cæca sem-  
per, & superba, à quibus notha proveniunt, spu-  
ria, & illegitima, quæ commaculant hanc san-  
ctam



etiam familiam & ad contemptum prostituunt. Li-  
berè loquor pro iusta causa. Non exspecto oblo-  
quutorem, nec is mihi apprecandus. Congredi  
cum nemine volo, habuimus spectaculorum satis.  
Delectamentum nostrum sit tranquillitas, dum  
verè sapiamus. Beatam vitam tranquillam dicimus  
meritò, quæ extra pugnas; & felicem doctrinam,  
ubi non rixantur homines, & sapientiam discer-  
punt, sed ubi uno animo hanc conservant, & in-  
star thesauri incorruptam custodiunt & tuentur.  
Novimus belli furorem & damna, bonâ ob id ab-  
scondimus, & hanc furori exponemus? absit im-  
provida manus. Tangunt Dei sobolem iniusti,  
terreat hos tremendus vindex. Ita, vir Magne, a-  
pud te loquor, qui meam hanc sententiam semper  
laudasti, mecumque hujus gratia non paucas ho-  
ras, sed & integros dies voluisti consumere. Incita-  
sti currentem. Veneror tuam humanitatem, tuam-  
que prudentiam valdè honoro, quod inter tot ar-  
dua, & varias occupationes, quas pro serenissimo  
Electore indefessus & cum gloria sustines, ad  
philosophiam, quæ pro scholarum saltem solet  
haberi ineptiis, te demiseris, nomenque tuum  
huic ordini immiscueris. Res pulchrè procedet,  
quum præsides & defensores sapientiæ ipsi philo-  
sophabuntur. Ego de restauranda recta philoso-  
phia hoc librò, quem tuæ Amplitudini humilli-  
mè of-



mè offero, & inscribo, consilium confeci. Fave  
huic, & si bonum, illud promove. Deus te ser-  
vet rectæ philosophiæ patronum. Scribebam Lug-  
duni iplis Kal. Mart. Anno clō Iō c LXII.

FRIDE-

114

FREDERICVS SCHERERTZIVS  
Lectori ab omni præjudicio purgato &  
libero  
C O N S T A N T I A M.

**E** quoque heic alloquor, Lector. Tecum, Candide, lu-  
bentur ago, cum interprete meo fideli. Rem ipsam co-  
gnosces ex nomine, inter lacrimas fabricato philoso-  
phia deperdita. Adhuc solatium, potest illa reparari.  
Amor exigit debitum. Id solvo pro viribus. Necessitati rerum  
succurrendum. Litterarum magna calamitas, tibi nota. In fun-  
damento hostis callidus everfor. imum periculum, mox corruet to-  
tum ædificium. Vacillant omnia. res mirè agitur, sapientes qui  
cupiunt videri, desipiunt, & sub pulcra actione & lingua animo-  
sa atque efficaci distrahunt fulcrum, ut ludat ingenium potens ad  
damnum. Cadit Colossus, desinit miraculum, deseritur Rhodus.  
Philosophia, annon hæc miraculum? dejicitur, partes frangun-  
tur, quod restat, maculis obruitur, deficit veneratio, oracula fal-  
lunt, opinio succedit, quam superstitiosus adulator reddit vene-  
rabilem. Incerta sunt omnia? Dissentit, qui cupit. Est vates  
lapsus arrogantia. labuntur omnes, & sacer præco, fori orator,  
nature auxiliator, & boni publici dominus atque curator. la-  
buntur certè, nam fulcrum contemnunt aut negligunt superbi,  
vel cæci. Tu illud quæres, & tenebis sacrum scipionem. Nemo  
consistet sine hoc, sine recta Philosophia. Percepi damnum ipse  
olim seductus relligiosè. Ad me ipsum redii, divinæ bonitati  
gratias ago, quæ me duxit. Quid in me vidi? cohortem opinio-  
num resipiscencia disturbandam, delendam, sapientiam adulteri-  
nam eiiciendam. rectam desideravi & genuinam. Obvenit nobis  
tota humana, arripiamus illam, quæ optat nostrum consortium.  
Est vita vita, & anima anima, veneremur divinam virtutem.  
Dedè



*Dedi consilium non primus suasor, sed aliorum praeceptorum amator.  
Consentis bone? non dubito, propaga doctrinam, & ubique fer-  
vide clama, ut homines serium rem agi audiant, omnia littera-  
rum mala dependere à contemptu, & neglectu rectae philosophiae.  
Clama, diram esse opinionem dominam, & consuetudinem cœ-  
cum ductorem. Caveant sibi imposterum homines, seductor astutus  
semper adest, in excubiis quoque & vigiliis. Vale, & veritatem  
profutere semper, et ubique.*

MEDI-

# FREDERICI SCHERERTZII MEDITATIONUM

D E

## RECTA PHILOSOPHIA

LIBER I.

### CAPUT I.

**A**D culturam sapientiæ, Homo, tendis, generosa  
est mens tua, pulcrum iter, Animosè perge,  
non retrahe pedem, justum namque est & de-  
corum, perseverare in bono. Cœpisti benè,  
viator es in via bona, bona te circumdant. Vide, quis  
tecum? Virtutem comitem habes; Deus tibi dux adest,  
rectitudo, veritas, bonitas, non poteris errare. Sed at-  
tende, liberalis res est, quam suscepisti, animum adhibe  
liberum. Totus huic vacare debes, dum totam cupis. Sub-  
duc te aliquantulum corpori, ut sine gravi onere proce-  
das, & sine impedimento. Divi sunt tui socii, divinū illud  
quod in te est, illis associabitur. Progredere, progredere,  
non poteris securius. Metam spectā, non procul abes. Te-  
tigisti illam, lætus rem inchoa. Ad agrum venisti divitem  
& spatiosum, labore opus est, omnia etenim tibi heic  
sunt pernoscentia. Ne terreat te quod dico, fume ani-  
mum; pulcra esse solent & accepta, quæ difficultate pa-  
rantur. Terram coles, & in sudore acquies, quod te pas-  
cet. Tolera hanc vitam prudenter, melior virtuosus  
non conceditur in hac mortalitate. Sed non frustra la-  
borabis. Mercedem habebis magnam, quam tu ipsemet  
tibi

A



tibi procuras, Deus parat; colligit hic singulas sudoris tui guttas, tanquam pretiosas gemmas, ut coronam conficiat ex his tuo capiti sua manu imponendam, sicq; ex Philosopho rex fies, splendidior Ægyptiis, qui ab hominibus constituebantur, tu ab ipso Deo, & in hoc gloriosior certè, dum certior, te sola virtute ad hanc dignitatem pervenisse, illos sapius ex cæco eligentium favore. Sed rursus ad agrum. Rerum colendarum in hoc multitudo, magna varietas, nihil intactum relinques, facultas tibi data est tractandi omnia, & ingenium. Prudentiam adhibe, ordinatæ res omnes sunt, & iusta serie dispositæ. Nihil, quod naturâ distinctum est, tu mente confundes. Scias hoc velim, non creaturarum ordinem aut divinæ providentiæ statutum debes mutare, sed hoc unum, tuas cupiditates. Has remove. Admirare devoto corde quæ vides, perpende cuncta sedula mente, & uti in se sunt discere & doce. hoc tuum erit studium ad erudiendum infimos, ad illuminandum cæcos, ad hominum salutem. Sic implebis officium boni viri. Improbus omnis ille, qui sibi solum sapit. Verùm non melius poteris, quam si liberè. Gaude, nil obstat, liber es. Abi, experire tuam felicitatem. Elige locum ubi nil te impediat, omne institutum tuum promoveat, secessum ama ab hominibus probè remotum, nam extra hominum societatem discere nunc debes veram humanitatem. Mores indue solitudini convenientes, severitatem, austeritatem, supercilium, ut te omnes solum linquere velint, nemo impedire. Necessum est hoc. In Philosophia non decet aliter. Non cura iudicia hominum, ne turbent te, tu supra hæc omnia positus es. Cogitabundus semper esto, nil age, nisi meditari, & hoc omni tempore, omni loco, quum edis, quum bibis, & siquid aliud ex necessitate tibi faciendum est. Semper intentus.



## P H I L O S O P H I A.

intentus sis rebus tuis, sic tua Philosophia, tua Diva & Patrona te admonet, hortatur, rogat. Aperitur tibi liber, ad-  
sta, lege, ne recede, à capite ad calcem, uti loquimur, per-  
legendus, non datur respiratio. Nihil te ab hoc removeat,  
sacer est, Dei manu exaratus, nihil te retrahat, nulla sa-  
luratio, si quæ obtinget, nullæ deliciae, si quæ offeren-  
tur, nulli honores, nullæ divitiæ. Contemptum & risus  
sperne. Contemptor terræ terram scrutare. Sed quænam  
in te est infirmitas? Illa quæ in omnibus, qui mortalium  
gerunt naturam & nomen. Ideò, ut hæc dignè facere pos-  
sis, invocandus est Dux tuus, totius hujus universi fabri-  
cator & custos, ut hic tibi largiatur validam mentem. In  
ejus gratia positum est robur tuum. Hic creator tuus &  
conditor, qui te fecit & excitavit ad cognoscenda sua  
opera, te præparet, precor, ad hoc & conserve. Age, crea-  
turarum gloriosissima, philosophare, habes ante oculos  
fatis, in quo te exerceas, modò hoc veritate facias atque  
constantia.

## C A P. II.

**S**apientiæ cultor es latere, illustre geris nomen, quod  
tua virtus tibi parit ad laudem. Tuere illud, ut vera  
hæc tibi contingat, & durabilis. Bona tibi nunc nasci-  
tur occasio, capillata. Age quod agendum est, arripe il-  
lam, post hæc erit calva. Agnosce & conserva tuam dig-  
nitatem. In latissimo mundi campo positus es universi  
hujus dominus, subiecta tibi sunt omnia, Imperator es,  
ritè exerce imperium. Amplam obtines jurisdictionem,  
amplam adhibe mentem. Omnem terram, totum mun-  
dum, coelumque & quicquid in his est, possides. Dives  
à modum es & locuples, pondera has tuas divitias, ex-  
pende tuam hanc felicitatem. Plenus incede lætitiis, quia

A 2

Deus



## D E R E C T A

Deus tibi suæ potentissimæ auctoritatis hanc magnam tribuit partem, teque ad id elegit opus, ad quod non nisi divina requiritur natura. Aude, cælesti ejus virtuti nihil similis, nihilque carius hoc studio. Hoc omnia feliciter, & dignè perages. Non puta, te sortis esse abjectæ, ideo quod solus habites & in eremo, quodque homines te irideant, vinctes hæc tua mente. In palatio habitas, quod ipse Deus exstruxit, ubi cum Diis conversaris, cum sacris illis laribus, qui dum videri non possunt, te docent, visibiles hos mundi satyros fugiendos esse, horumque vocem tanquam barbarum boatum non attendendam, aut tolerandam; in palæstra etenim patientiæ es constitutus, utque heic in te ipso quoque philosopheris tam parvi, quam magni mundi perscrutator & doctor. Natura omnium rerum tibi tradita est, ut hanc consideres, necessum est, ut & te ipsum. Dum vero ita studes, duas vides insignes, unam producentem, alteram productam, creatorem & creaturas. Nota compendium; dum unam tractas, alteram excolis, dum creaturas spectas, creatorem invenis, ita hujus mirabilis potentia latet in omnibus. Unus amor Dei est cum creaturis, & indissolubilis horum conjunctio. In omnibus, quæcunque scrutaris, tibi divini hujus opificis apparet manus luce circumdata splendidissima, quæ te illuminat, instruit, corroborat. Sacra apparitio, revelatio solemnis, quæ magnâ die tibi accidit, sensus tuos omnes excitat, convocat, & ordinat ad cognoscenda singula mysteria, quæ creator omnium sibi & rebus creatis indidit. Exhibe illi omnem pietatem, flexis genibus, flexoque corde procumbe, & tuum hunc divum apparitorè humillimè roga, ut tibi ejus sanctissima majestas clementissimè concedat exosculari suam mirandam manum, sub hujus protectione securus vives, tutus ab omni periculo.



## P H I L O S O P H I A.

5

periculo. Animum tibi fume, gratioſè is annuit. Benevolus enim eſt & expoſitus ad exaudiendū mortalium preces. Exoſcularè illam manum, illam tuam amicam; porrige ei oſculum magnum, nam magna hæc eſt, comprehendens coelum & terram; ſapidum, ut id ſentiat, purum & caſtum, nam pura illa tua eſt, immaculata mente vult coli. Quam felix es. proſit hæc tibi felicitas, in qua autem hoc unum vitabis, exorbitantiam, quæ tibi nocebit. Terminus tibi poſitus eſt, ad hunc ſubſiſte. Noſti tuum circulum, noli evagari, extra hunc errabis. Ardens habes ingenium, cohibe flammam. Reſtat adhuc aliquid primi tui patris fulgoris in te, quo benigniſſimum Numen ſapientiæ ſuæ radium tibi impertit, utere hoc decenter. Sacræ namque hæ ſunt reliquiæ, non debent aliter tractari. Studebis maxime rectè judicare, hæc recta eſt philoſophia. Videre, audire, guſtare, olfacere, tangere, hæc in te ſunt ad acquirendam ſapientiam instrumenta magna & valida; adhibe hæc cum curâ, pura & integra, ut rectè omnia, prout in ſe ſunt, intelligas, nam ita res omnes volunt addiſci. Non eſt in rebus vitium, ſed in animo tuo.

## C A P. III.

**Q**uamobrem, ut ad rectam ſapientiam pervenias, proſpice. Ne te ſeducat calliditas aut imprudentia ſeculi, quam olim ſæpius vidisti. Discernere te oportet vera à falſis, ſi rectè ſapere cupis. Non una quævis ſapientia heic valet. mundus multas jaçtat & varias. Una verò ſaltim eſt vera, cui tu operam navabis. Rectè incede, offendes hanc in via. Non deſſecte neque ad dextram, neque ad ſiniſtram, recta perge. Saluta hanc di-  
vam, præ te eſt, & obſecra illam, ut tibi faveat, benigna eſt, placida, parata, potens, non denegabit tibi id, quod

A 3

ab



ab illa petis. Sed non audes? ero ego tuus pararius. Salve, salve, magna Domina, illustrissima proles, coeli filia, mundi altrix, animi nostri nutricia, sis mihi, quaeso, veniae larga, habeo aliquid quod tuae celsitudini dicam, audi mea verba, amplificare volo tuum imperium, accedit mecum aliquis, bonae mentis socius, tuae pulcritudinis aestimator, tecum habitare cupit hic homo, nam ita pulcra es, ita amabilis, ita mortalibus benigna, accepta, & necessaria. Et mox ille audacior factus mea audaciâ: Salve, O pulcerrima, sapientissima Dea, assume me in tuum contubernium, si tuae celsitudinî hoc placeat, sum homo qui sapere cupit. Eleganter loqueris, amice, respondet illa, & uti decet verae sapientiae studiosos, non alios desidero discipulos. notanda hæc hora, quæ te mihi jungit, amari cupio, sed paucos habeo amatores. indecora & frequens res est, ad meretrices itur, ad prostibula, quæ, nescio quo fûco, homines ad se trahunt, totosque occupant, ut hi non aliter velint, nisi delectari spurcitiis, hacque simul corripiantur firmissima opinione, dicam cœcitate, nullum amorem in mundo aut honestiorem, aut veritati magis consentaneum esse hoc ipso, seque esse veras veræ sapientiae magistras. Sed ô prudens tu! qui fugis istas seductrices. Beatus tuus conatus, tuaque cupiditas laudabilis quæ te in veram deduxit viam, ad me, quæ tibi omnem favorem promitto, magnos Deos tibi conciliatura adjutores. Quicquid inchoaveris, nunc bene procedet. Veni, numerabo te inter sapientes, nomenque tuum inscribam libro æternitatis, quem Deus destinavit generosis ingeniis. Venio, inquit lætābundē ille meus, potentissima, venio animum meum occupasti, sum tuus, voluntatis tuæ diligentissimus executor. Beatus ego, & ut dicam id quod in me sentio, totus  
illumi-



PHILOSOPHIA.

7

illuminatus, & quidem? Solem video novum, magnum, penetrabilem, efficacem. Gaudeo, è tenebris namque ereptus in verâ constituor luce. Rectè judicas, Homo, beatissime mortalium. Duos habes vitæ tuæ auctores, Deum & hanc Deum Ille facit quod vivas, hæc pariter quod benè vivas. Utrique fideliter adhære. O Æterne! conditor gratiose, tuum est benefacere mortalibus. Tu auctor & conservator sapientiæ mortalibus concessisti hanc immortalem dignitatem, quod sint tuæ divinæ virtutis in hac infirmitate fausti imitatores, inque corruptibili hoc corpore divinitatem quandam monstrent admirandam, sicque à communi hominum genere separati Deorum in hac terra constituent cohortem. Tibi dicata sit laus omnis & gloria. Et Tu, O divini numinis pia æmulatrix! tibi debetur honor, & cultus. O Præstantissima! tuum est de opus divinis humanisque verum invenire, à te nunquam recedit justitia, pietas, religio, & omnis alius comitatus virtutum consertarum, & inter se coherentium. Tu doces colere divina, humana diligere, & penes Deum imperium esse, & inter homines consortium. Venerare hanc magistram, Homo! scholam aperit, in qua dum discipulus es, cæli, mundique sis contemplator.

CAP. IIII.

UT verò benè hujus capias doctrinam, mores indue aptos. Philosophia feros non tolerat. Moratum te optat hæc morata. Rege te ipsum magni & universi istius regiminis dilucidator. Ethicam tibi propone litteratam vitæ tuæ normam. Et quidem ante omnia Cteatorem & conservatorem omnium rerum semper venerare, nec quid aude, quo ipse sanctissimam Majestatem offendas. Vindex est gravis injuriæ & severus. Fuge illius iram, quæ intolerabilis.

II. Te



II. Te ipsum vince, nullisque inordinatis affectibus, qui quotidie adversus nos mortales insurgunt, quicquam concede. Habenam tibi ad id datam nosti, rationem, hanc ritè adhibe.

III. Veritatem tibi propone verum & unicum laboris tui scopum.

IIII. Nihil pro vero admitte, nisi quod certè & evidenter verum esse ipse cognoveris.

V. Temeraria hominum judicia & reprehensiones, si quas forsàn audieris, non cura, sola tua conscientia tuus admonitor, secundum hujus consilium procede.

VI. Constanter & tenaciter proposito tuo adhære, & indubitanter in peragendo persevera, ut uno tractu absolvas, quod inchoaveris.

VII. Si forsàn in via es non trita aut dubia, recta tendè, non poteris melius, evitanda siquidem sunt omnia devia.

VIII. Cogita semper & meditare omni cura, tota mente & integra, quæ se huc omni fervore convertat. totus præsens esto rei considerandæ; nil, nil cura nisi hanc.

IIII. De omnibus rebus, quas olim addidicisti semel in vita tua dubita, ut ita omnia præjudicia & servitutes deponas, quæ hodiè communiter ingenia occupant.

X. Gradus scito philosophandi & methodum. A rebus simplicissimis inchoa, & quæ facile possunt cognosci, & sic porrò per scalas ad magis composita & difficiliora progredere, hæc omnium optima est ratio, tentata ab optimis quibusque antiquioribus sapientibus feliciter.

XI. Difficultates, quoruncunque obvenient, diligentius nonnihil pondera, examina; in certas partes dispesce, perspice, & exactè tolle.

XII. Vide



## P H I L O S O P H I A.

XII. Vide ut purè semper res tractes, hoc est, animo probè purgato, & qui nihil admisceat. Hærent enim in te multa, quæ naturale illud lumen, quod in te est, valdè obfuscant & corrumpunt. Ipsi menti annata est quædam falsitas & pronitas ad errandum, estque instar speculi inæqualis & non benè politi, quod ex mala sua figura res, quas refert, immutat & malè proponit, haut sincera ad veros rerum radios excipiendos. Et vita tua inter supersticiosos & idololatrias à prima juventute fuit exculta. Purga purgandam. Nihil admisce. Scis enim quantum nocuerit Reipublicæ sophistica illa, empirica, & superstitiosa philosophia.

XIII. Jus habes & dominium ex divina donatione tibi concessum. Fac ut prudentes dicant, te sapienter administrare concredita. Terreat te mala fides multorum. Nosti exempla, vidisti scandala, spectasti damna. Vigila ubique. Circumspice, seductor à latere, retrospice, hostis à tergo, introspecte, malignus socius in animo. Cautè evita periculum, Potes.

XIV. Non faciat te superbum hæc tua dignitas aut potestas. Humiliter de te ipso semper ut sentias, omni studio annitere, nam facile homines in errorem prolantur, quum de se ipsis judicant.

XV. Sensibus & imaginationibus te sedulum præpone judicem, ne tibi sint damno, quod sæpius contingit in vita. Scis sensuum culpam. aut enim destituunt nos, aut decipiunt. Nam certum est, plurimas res esse, quæ sensus etiam rectè dispositos, nec ullo modo impeditos effugiunt, aut testimonium & informationem sensuum fieri ex analogia hominis, non ex analogia universi, uti decet. Quare sensus, quum tam valdè errent, nequeunt esse rerum cognoscibilium mensura. Ab intellectu vera

B

ordi-



orditur philosophia, non à sensibus.

XVI. Non placita & opiniones aliorum sequere, sed naturam, hæc una tua est bibliotheca, quam Dei manus composuit & ordinavit.

XVII. Errores tuos dum abdicare cupis, vigila, & cave ne illos permutes, nam sic manebunt.

XVIII. Ut certa tandem ab incertis distinguantur, & incerta per certa demonstrantur, verum philosophandi adhibe modum.

XVIII. Non vagis & debilibus conjecturis, sed firmis & evidentibus argumentis uti debes. Non bellè & probabiliter opinari, sed certè & ostensivè intelligere.

XX. Tria in animo tuo sibi valdè sunt finitima: Intelligere, credere, opinari. Animadvertè. Intelligis, id quod ratione comprehendis, credis id, quod autoritas tibi persuadet, opinaris dum existimas, te scire quod ignoras. Intelligis? rationem habes. credis? obsequeris. opinaris? erras. elige nunc id, quod tibi conducatur.

XXI. Quum omnis cognitio non solum fiat per similitudinem, sed & ipsa ipsius rei sit similitudo, videndum sedulò est, ut res perfectè cognoscatur. Cognoscitur autem res ita, quum, sicuti est, verè attingitur.

XXII. Primas omnium rerum causas investiga, & ex his reliqua diducere stude.

XXIII. Observa, principia partim clara esse debere, & evidentia, ita ut mens tuâ ea attentè capiat, & deprehendat, vera illa esse maximè, & apertissimè hoc videat, partim ab his omnia alia ita dependere, ut cognosci quidem illa possint non cognitis istis, sed istæ non vicissim absque illis.

XXIII. Postquam in principiis istis tam probè vigilaveris,



## P H I L O S O P H I A.

laveris, ita, velim, omnia digeras, ut ne minimum in philosophia tua inveniat, quod non sit maxime manifestum

XXV. Si forsan quædam non poteris attingere, noli exinde statuere, id ex arte tua esse impossibile. Persevera magnanimus. Artis tuæ infirmitatem, dum querelis uteris, in naturæ ignominiam vertis. Laborem non fuge Deorum amicus. Naturæ obscuritatem, vitæ brevitatem, sensuum fallacias, judicii imbecillitatem, experientiam difficilem, vagam, incertam, & infirmam ingenio supera. Penetra ad intima & fulcrum naturæ.

XXVI. Meditationes tuas, quum aliquando has publicæ consecraveris utilitati, ita ordina, ut mentis & rerum arctum fervetur conjugium, fertile illud, veræque prudentiæ seminarium. Nam notionēs mentis malè ac temere à rebus abstractæ, & vagæ nec satis definitæ & circumscriptæ, denique multis modis vitiosæ faciunt, ut omnia ruant Stabit Respublica litteraria illo conjugio.

XXVII. Imperum ingenii tui cohibe, non sectam condere stude, non vetera prosternere aut destruere, sed hæc emendare & perficere.

XXVIII. Non methodi compendium quære, naturæ ordinem sequere, atque conserva; non speciosam sermonis tui formam excogita. Sit fluidum illud & naturale orationis genus.

XXVIII. Fiducialiter de rebus pronuncia, ut cognoscant homines, te certum esse doctorem.

XXX. Consideratè & post longam deliberationem de rebus pronuncia; non tam facilè, ne scientiam reddas sic contentiosam & incertam, nec semper in deliberatione hære, ne inquisitionem introducas vagam & sine termino. Intellectui danda hæc est cautio.

B 2

XXXI. De



XXXI. Doctrinam contentiosam planè rejice. Non disputa, sed experire. Aliter sententiarum dogmata ne recites, suadeo, tu tuam probes, & corrobore.

XXXII. Non vulgi quære applausum, sed sapientum judicium.

XXXIII. Non famę & nomini tuo stude, sed scientiarum & artium utilitati.

XXXIV. Justa & apta ætate ad philosophandum accede, ut ritè hoc facere possis, & utiliter.

XXXV. Ad cognitionem Dei & tui ipsius semper adspira, quæ si probe, quantum in hac mortalitate tibi concessum, cognoveris, verus, probus, & rectus eris philosophus.

XXXVI. Firmiter philosophare, & ita, ut certus ipsemet sis, te in omni studio ratione quam optimè uti.

Hos mores tibi ostendi in hac tabula, & certa serie. Dispone te ipsum, & obsequere, suasor fidus est, qui hæc non hausit ex philosophorum placitis, sed ex ipsa natura, hujusq; bona interpretatione, quiq; per tot confusa rerum dogmata, & scholarum turbas tandem ad veram scientiarum instaurationem pervenire didicit, novis indutis his moribus, qui liberum hominem efficiunt non mancipium, religiosum non superstitiosum, naturæ contemplatorem, non dogmatum, veritatis sectatorem, non communium opinionum æmulum, rectæ Philosophiæ studiosum, qui hoc unum valdè cognoscere debet, nunquam ad veram pervenire posse sapientiam nisi rejectis istis ingeniorum idolis, quæ mentem opprimunt, & à verò impediunt.



## CAP. VI.

**R**atione opus est, ut vides, eaque recta, quam exercere debes, & probè regere. Impellat te præstantia hujus & necessitas. Dedit hanc Deus hominibus tanquam maximum bonum, eisque præ omnibus animalibus proprium, quo hæc antecedunt, illum sequuntur. Cætera, quæ habent, ea illis cum reliquis animalibus satisque communia sunt. Attende ad rem. Valent homines? & leones; formosi sunt? & pavones; veloces sunt? & equi; corpus habent? & arbores; impetum & motum voluntarium? & bestię & vermes; vocem habent; sed quanto clariorem canes, acutiorem aquilæ, graviorem tauri, dulciorem, nobilioremque lusciniæ; denique rectam habent rationem? hanc soli habent. Æstima hoc bonum, & venerare. perpende, hanc partem esse divini spiritus in corpus humanum mersam, unum, verumque bonum mortaliū, si hoc non habent, cæteris omnibus, quæ possident, non possunt uti. Propter hoc bonum homines vocantur boni, non propter pulcrum corpus, non propter honores, non propter divitias. Observa simile. Navem bonam non argenteum, aut aureum efficit rostrum, aut tutela ebore cælata, aut opes quas vehit, sed stabilitas & firmitudo, & junctura aquam semper excludens, quæque gubernaculo paret, & vento consentit. Ita gladium bonum nominamus non propter baltheum deauratum, aut ob vaginam gemmis distinctam, sed quia benè secat, subtilis est & acutus. Sic regulam laudare debes non formosam, sed rectam. Bonum itaque hominem bona efficit ratio, recta illa, & cui fidere possumus. Utinam desinant illi, qui malitiosè, aut improvidè hanc negligunt vel corrumpunt & erroris magistram hanc faciunt injuriosè & in-

B. 3.

blasph-



blasphemiam creatoris. O utinam desinant. Ast non ita exclamo, ut meo sermoni accedat elegantia, videarque rhetor, sed ut ingenio succurratur, & corrupto litterarum statui. Recedite, erratum satis est, mortales. Defendite vestram gloriam. Hære vultis in veteri? esto. Non placet vo bis divinum illud, quod in vobis est, aut negligere illud vobis persuadet arrogans vester animus, aut tyrannus ille imperat consuetudo, vos subditi & mancipia. manete in vinculis, volenti non irrogatur injuria.

Sed quid est bona sive recta ratio in homine? Explicabo tibi hoc, & dicam. Et primò quidem, ne te seducat ad errorem ea, quæ huic attribuitur, bonitas sive rectitudo, ut putes, expertem hanc ideò esse peccati illius, quod ex primo parente in nos traductum, quod quibusdam contigit qui perversi Socini scholam frequentant, nota, rationem rectam dici, quod, dum ratio cinatur & judicat purgata sit ab omni idololatria & superstitione, libera ab omnibus præjudiciis & affectibus. Memore esto morum illorum, quos tibi mox enumerabam, nam eò res omnis recidit, habebis illud in te bonum, custodi hoc benè, & cura ut ritè officio suo fungatur. monitum ne contemne. Ne tibi hoc excidat. Si hoc non retinueris, infauſtus eris philosophus. Deinde ut ad rei hujus pervenias justam notitiam, considera intellectum, qui in te est, qui partim res contemplatur & intelligit, ut modò sciat, quæ ac qualis cujusque rei sit natura, proprietas, operationes & hujusmodi alia, partim res intelligit & apprehendit, ut id, quod cognoscit, agatur & fiat, omniaque examinat, deliberat, quomodo hæc fieri possint. Ibi nuda saltem rei cognitio spectatur, heic majus quoddam studium, deliberatio, & judicium quid sit agendum, & hoc voluntati aliisq; facultatibus inferioribus præscri-



præscribit. Ibi intellectus contemplatur, heic operatur. Porro investiga illud, circa quod intellectus occupatur, & invenies aliquod initium, & postea quiddam quod concludit, quod sequitur, rei essentia & veritas. Initium verò dat tibi propositio per se nota, cujus veritatem per se ex natura tua cognoscis; modò percipias terminos. Consideras & exactè evolvis, ne minimum quid omittis, concludis tandem quum enuncias, & ex principiis deducis, per ratiocinium, id quod sequitur, cujus cognitio non ex sola verborum cognitione provenit, sed ex discursu. Et ex principio isto concludit intellectus tuus adiutus solo lumine naturæ, nam nec revelatio, fides, aut gratia heic se volunt immiscere, natura hominis nunc libera esse debet, & à nulla majestate coacta, cujus exempla sinceriorum Ethnicorum philosophia abundè suppeditat.

Credo te sic faciliè intelligere, quid recta sit ratio. Non opus est ulteriori explicatione, nam verba dilucida sunt & perspicua, fundata. Sequitur enim ex his, quæ dicta sunt illam esse naturale judicium intellectus, ex principiis, quæ nobis naturæ sunt cognita, factum secundum legem & lumen naturæ, veritatis naturalis fontem & originem.

Putas itaque in te esse virtutem? tibi certò persuade, hanc esse primam & præcipuam, imò omnis tuæ vitæ unicū decus, & fulcrum. Et quid virtus? illud quod habes, acquisitum, quod possides, laudabile & quod cum recta ratione convenit, *ἐξ ἧς καὶ τὰ πρὸς ὁρθὸν λόγον*, uti verè doctus Aristoteles Nicomachum suum in moralibus docuit. Hic in te est, norma mensura & regula omnium illorum, quæ scire cupis & agere. Quicumque hoc negat, is omnem evertit naturam, & doctrinam, dumque in his, quæ naturam spectant, sacrum quoddam docet & novum in homine judicium, indecenter maximè, & indoctè se prostituit.



tuit superstitiosus adulator, quique confundit & commiscet, quæ in æternum distincta manebunt. intelligis, credo, meam mentem. Nam gratiæ opera operibus naturæ, lumen fidei lumini naturæ opponere sapientis non est, aut legem divinæ scripturæ legi naturæ, quam inscriptam esse cordibus hominum ipse docuit magnus Apostolus. Omnis scientiarum numerus dividitur in unam divinam, quæ æternæ salutis magistra est, & in reliquas humanas, quæ ad intelligendam & conservandam naturam universi adhibentur. Illa suam sibi habet destinatum sedem, ex qua non est detrahenda, sacra obstat manus; & hæc collocatæ in inferiori æternæ providentiæ theatri parte, à loco sibi dato non dimovendæ. ludus enim variandus non est à spectatore. Sanè multæ rixæ & altercationes & scandala desinent, si divina scientia non immesceatur humanis, & divina auctoritas humanæ rationi, quæ obedire debet, dum illa imperat. Divina scientia attendit semper ad Dei eloquia, humana ad naturæ dictamen, quam Deus ideò fecit, et ita ex se cognoscendam semel præparavit. Quicumque rectè cupit philosophari, soli naturæ debet incumbere, solaque ratione procedere, ut simul demonstraret, quanta industria hanc divinam suam partem excolat, et quanta vis huic insit, si justè adhibeatur, quod vix videre potest, quum divina illa interponuntur oracula, quæ hanc jubent silere. Ratio humana in naturalibus sibi relinquenda est, sed hac animadversione, ut probè dirigatur, quod satis apparet ex regimine illo ingenioso, subtili et perspicaci, rebusque maximè convenienti multorum doctissimorum hominum, quos vetus protulit ætas, et quoque recentior, et quibus purior placuit philosophandi modus, & verus. Et dirigenda sanè ratio est, nam suos hæc habet naves, qui emendandi. Etenim nolo,  
nec



nec possum aut debeo statuere aut docere, rationem ideo dici in te rectam, ac si neutiquam possit errare, quo modo nulla in hominibus foret. Manebunt siquidem errores, dum hæc mortalitas, nihilque heic perfectum datur ex omni parte. Attamen jus mentis, quod homini divinitus concessum est, exercere apprimè debes, prout fidelem decet ministrum. Judex constitutus es naturæ, veri defensor, instructus magna virtute & potentia, æquitatem administra, vide et cognosce causam, equâ semper pronuncia sententiam, providam & diligentissimè curatam, sapienter conclude. Interpres es legis, ejusque præses, injustum quod est, planè evita. Officio tuo fideliter fungere. Rectam adhibe rationem, ut rectè judices. Rectus eris index, dum hæc in te recta.

## CAP. VI.

QUM itaque hæc res tam præstans sit, & necessaria, Ars exinde constituta est, quam quidam Veterum Dialecticam vocarunt, Democritus, qui tres libros sub titulo Λογικῶν referente Diogene Laërtio scripsit, peripatetici postea ac Stoici omnes logicam, quæ duo eadem esse ipsum examen, & ex hoc Plutarchus scriptor optimus libro primo de Philosophorum placitis docent. Ne disputes tecum, rogo, quodnam ex his duobus magis debeas eligere vocabulum, nam hoc studiorum genus planè est inutile, & damnum affert, multis scholis detrimentum, ingenio impedimentum, remoram, & ad devia calcanda potentem seductorem. Ad rem ipsam semper propera. Dum dialecticæ operam navas, logicæ studes. Abjice inanem vocabulorum curam, & otiosorum criticam ne sectare. Vita tua brevis, tempusque ruit irreparabile. benè

C

hoc



hoc impende, & utiliter. Subtilitati aut acuminī non in margine incumbere, sed in pagina, heic augustius est spatium, ubi res ipsæ. Multæ sunt, quæ plura quam unum habent nomen. Consule Grammaticam. quid sunt mas & vir, foemina & mulier, domus & ædes, gladius & ensis, sermo & oratio, margarita & unio, crinis & capillus, rusticus, & agricola? unum æquipollet alteri, dialectica logica, & hæc illi.

Sed quem audīo? Platonem, senem venerabilem, qui in suo Sophista de hac Arte pulchrè ratiocinatur, dum illam vocat τῆς ψυχῆς ἀπὸς ἑωτὴν διάλογον. Ratio heic conveniunt & oratio, λόγος καὶ διάλογος. Observa modò, quam pulchrè tibi hic doctor rem ipsam monstret in nomine. Anima dum ratiocinatur secum loquitur, se ipsam interrogat, respondet, affirmat, aut non affirmat, concedit & negat. Unde intelliges illud, quod hic ipse Atheniensium Professor libro septimo de Republica scripsit his verbis: νομοθετίσιν δὲ αὐτοῖς ταύτης μάλα τῆς παιδείας ἀντιλαμβάνεσθαι ἕξερωτᾶν καὶ ἀποκρίνεσθαι ἐπιστημονέσσι αὐτοῖς ἐσθλὰι. Legem ferendam esse suadet, maximè disciplinam amplecti, ut interrogare atque respondere scientissimè possint. Eum verò qui interrogare scit & respondere, quid tu aliud vocabis quam dialecticum, ita ille ipse auctor quærit & respondet in Cratylo. Quemadmodum autem is, qui interrogat id cupit scire ex altero, quod ad rei cognitionem ducat & veritatem, & is qui respondet eò allaborat, ut interroganti satisfaciatur, eumque erudiat; pari modo anima in hoc colloquio procedit, & à se ipsa ad interrogata exposcit responsum, ut rem cognoscat in sua vera essentia, ad quam penetrare desiderat, dum quærit. Elevandum illud maximè est dictèrium quod apud plebem non nisi illiberaliter exercetur. Interrogando erudior. nam haut melius, aut felicius doctrina ac-

na ac-



na acquiritur quam per hoc commercium, quod instituitur per animæ solitarium discursum. Agit cum se ipsa de re ponderosa, non timet defraudationem, seipsam decipere nequit generosa, nec intendit, sibi ipsi admodum fidens, ne imprudentiæ vitium incurrat, ad creatorem provocat gratiosum, & ne primi parentis lapsus, qui omnes hæredes violat, heic errans cadat, divino robore adjuta se stare sperat, & credit.

Memorable heic vides colloquium. considera porrò, quænam sint in illo maximè spectanda, & in quibus totum consistat. Invenit aliquid & disponit, hæc duo perspice, & illis, quæ mox sequentur, aures præbe. Invenit dum de argumentis est sollicita, dumque in illud inquitur cujus vires est, vel in illud, quod existit ex causis; vel illud in quod subjicitur, aut adjungitur; vel illud quod à re dissentit modo diverso aut opposito, quo quid aliquid refert, aut adversatur, aut contradicit, aut aufert; vel in illa, quæ inter se comparantur, uti paria, aut imparia, similia aut dissimilia; vel in nomen, idque varium, ejusque interpretationem; vel in illa, quæ distribuuntur; vel in illa, quæ rem definiunt aut explicant, aut de illa testantur. Disponit, quam de his omnibus judicat, & singula argumenta ordinat, ut argumentum de argumento enuncietur ad discernendam veritatem, & falsitatem, ut plura enunciata jungantur ad intelligendum, quid sequatur exinde, vel quid non sequatur, & ut varia enunciata jungantur ad distinguendam methodum, an ordinata hæc sit vel confusa, ex qua dispositione profluit judicium, & magnum commodum. Etenim paratur sic homo ad multa, ad exercitationes, ad sermones, & ad scientias. Modum habet de omni proposito facilius argumentandi, & dum aliorum audit opiniones, non ex alienis, sed ex suis



doctrinis colloquitur cum illis, discutiens omne id, quod haut benè dictum, quumq; scire cupit, sic conspiciet & verū et falsū, quos usus Aristoteles quoque docuit in suis libris Topicis, aut Eudemus ejus auditor, cui hi à nonnullis adscribuntur, & ante hos Plato longè efficacius & perfectius, quique hunc adhuc proponit, certè magni momenti, purgari ita posse animum à falsis opinionibus, quod officium celebre est Philosophi in anima, quemadmodum medici in corpore.

Propterea Logica sive Dialectica magistra est vivida & valida rationis docens colloquium & discursus, quos variis nominibus, propositionum, exemplorum, enthymematum, syllogismorum, methodorum, divisionum & definitionum indignantur. Attende sedulò, hæc rationis actus sunt & instrumenta, quibus omnis res, omnisque scientia, de qua vel cogitas, vel differis, vel scribis, utitur. Dic mihi scientiam, quæ his non indigeat instrumentis. Arti rationis primus dandus est locus, et meritò extollenda semper edocta mente, quæ cognoscere prius debet laudandam. Nil præteri, ut totam intelligas, magnæ structuræ, quam per labores tuos paras, solidum fundamentum. Perspectum hoc tibi est? ne minimum prætermisum? nunc celebra hanc pulcræ, & potentem. Quam vile est & irridendum, laudatorem habere, qui virtutem aut naturam rei non intelligit, sed saltem conjicit. A doctis laudari certum est, justumque præconium.

## C A P. VII:

**Q**Uam ob causam ut plenius intelligas hanc magnam, Artem institue apud te ipsum talem, quem paulò ante indicavi, sermonem, & animam tuam destina ad hoc colloquium. Quære tunc ex illa id, quod scire aves, & respon-



respondebit, age cum te ipso, ipse naturæ fidus & providus minister. Sit sola illa tua, nec impedita. Secede in angulum genius doctrinæ, ego procul idem tentabo mecum differens sub tecto piæ mentis.

Recta ratio quam meritò laudant terrestres, & coelites quoque, celebrem habet sedem, & illustre domicilium, hominem, qua creatura nec coelum, nec mundus pulcriorem vidit unquam, aut videbit, & natura memor sui hospitis divini illius & pretiosi, incitat hunc ad opus quoddam splendidum, ex quo elucescant auctoris dignitas & virtus. Naturâ ratiocinans, ô homo, qui ibi sedes, sanctum animal, & umbram levem hujus tui splendoris gerit illud, quod simile habet nomen, ut in omnibus, quæ vos habetis, tua patefcat excellentia, & tu dicaris divinum, & perfectissimum. Tu homo ratiocinans, & omnes homines, supremus & imus, nobilis & plebejus, dominus & servus litteratus, & is qui litteris haud est imbutus, consul & civis, & quod ille in curia, hic facit in sua domo, cujus rector & curator hic est, quemadmodum ille civitatis. Et in curia quidem aliquid video, quod me valdè instruit, & confirmat. Dies est decretorius, totus confidet Senatus, viros considero omnes, quotquot adfunt, patriæ patres, publica res administranda, salus civitatis promovenda, plebejus ad hæc electus est & patricius, doctus & indoctus, proponitur negotium, deliberatur ab omnibus, totum illud examinatur, & cognoscitur dirigendum, consilio opus, ab omnibus hoc exigitur, omnes respondent, suadent singuli, unus ex sua arte subtiliter, alter vi sola suæ naturæ acutè, uterque cum ratione, & cum judicio, hoc si probum, Senator laudatur, non patricius propter vitæ splendorem, non plebejus propter humilem originem, non doctus, quod artibus studuerit, nec contemnitur.



remnitur indoctus quod has non didicerit. Uterque salutatur prudens, quo nomine ipsi nullum dari potest augustius. Et qui sola naturali ratione hoc efficit, aut meretur, annon in primo locandus subsellio? atque in populari regimine quam benè procedit sapius res communis? Natura suasit societatem, hominesque duxit ad confortium, & ut illa vigeat, & conservetur, præcipit, & iuvat, jure ideò donata, quod sacratissimus Imperator Justinianus in Jurisprudencia sua illud nominat doctissimè; quod omnia animalia docet. Ast eamus ex civitate ad agrum, ubi inter boves & sues ratiocinatur rusticus, infimæ fortis homo, & quem pro ludibrio habere solent illi, qui altius sunt collocati. Est etiam in hoc rationis usus, & magna dialectica. Quæramus ex hoc rerum, præcipuè naturalium, conditionem, proponet nobis veram physicam ex fundamento, quod attigit solo naturæ lumine ad id perductus. Interrogemus, qualis sit Solis & Lunæ & omnium siderum natura, & quid efficiant, respondebit tanquam Astrologus. Quæramus, quæ anni sit futura tempestas, informabit nos, & certius non nihil quam is, qui Kalendarium nobis confecit & prognosticum. Quæramus, quora sit diei hora, & quodnam tempus, dicet hæc ex præscripto naturalis suæ conclusionis, & quidem hausto responso ex se ipso, quod nos ex horologio petimus.

Non puto prolixius hæc esse diducenda, sufficit enim brevis doctrina in illis, quæ perspicua in se sunt, clarè dicta, & sine difficultate. ac brevitatis ab ipsis rebus nobis imponitur. Opinionum siquidem & placitorum, cogitationum, & speculationum nec numerus est nec finis. Res constat, videlicet dialecticam esse naturam omnibus hominibus insitam, quæque se exserat variè & exerceat à se excitata,



citata, præparata, & directâ, vitæ humanæ unicum subsidium, & in omni perversitate, quæ in hac mortalium scenâ semper & ubique agit, solatium & auxilium.

## CAP. VIII.

**V**erum inquires, quum tanta naturalis dialecticæ est virtus, & omnibus hominibus innata, ad quid ergo conducit ille labor, quem in scholis adhibent discentes? audio præteriens sæpius magnum murmur, & dum attentius ausculto, hæc vocabula, aut locutiones: notio prima, notio secunda, categoriæ & prædicamenta, prædicabilia, totum, pars, causa, causatum, subjectum, adjunctum, definitio, divisio, propositio, major & minor, conclusio, & hujusmodi plura, strepitum quoque & clamorem, vociferatur: oppono, respondeo, insto, regeo, affirmo, nego, est hæc contradictio in adjecto, ad absurdum te deduco, & quæ sunt alia horum studiorum genera. Congrediuntur invicem ac si bellum geratur, & aures mihi interdum tremunt, ac si bombardarum tonitru illas moveat. Est ne heic gymnasium dialecticæ? Est forsitan, ubi quod anima nuper secum sola instituebat colloquium, nunc viva voce cum alio. Sed quis ille furor? qualis hæc est contentio? itane pervenitur ad veritatem? Audi. Ad exercitium ducenda est natura, & disciplinâ regenda, & corroboranda, ad profunda nunc progreditur & maximè abstrusam rerum sedem, ubi ingenium non in superficie amplius, sed in ipso studet corpore, novo modo, qui lucem comparat, quæ in imò rerum recessu mentem illustrat. Nunc novo instructus lumine laboras, nunc clarius cognoscis illud animæ tuum colloquium, nunc splendidius conficitur ratiocinium, nunc secretarium aut scribam advocat natura, qui hoc consignet, librumque conficiat, & totum



& totum processum argutè notet, à principio usque ad finem examinet. nihil omittere debet fidus naturæ interpretis, sed dignè omnia scribere, & utiliter, ut necessitate irrupente auxilia intellectui adsint, et præsidia. Furorem excusa, nam sub hoc later fervor, contentionem quoque, et pugnas, juvenes sunt, alacres, avidi, certant de victoria, vincere unusquisve sperat et cupit, nam militia militatur sub magno duce. Ast ne putes, me planè approbare has scholarum lites, quæ nihil asserunt, sed incerta omnia reddunt, aut destruunt; totamque philosophiam resolvunt in quæstiones, et dubitationes, qua ratione locum doctrinæ occupat disputatio, veram meam mentem tibi aperiam. Bono opus est magistro, et qui non insistit vulgari opinioni. Sit modus in rebus, ne ingenium ad excessum dilabatur, qui nunquam sine errore. Concedi possunt contentiones, ut hora conteratur, non dies, ut ingenium aliquid tentet, non agat, non tentamen substituat operi. Pugnae hæ adjocum magis factæ esse debent, quam ad seriā vitam, quam sectantur sapientes. Verū usum malei non ignorare debet faber, ita nec rationis, qui ad sapientiam tendit. Contentiones, fateor, providum te reddunt et circumspectum, ne quis te ducat in contradictionem, aut in absurdam sententiam, sed non te ferunt in veram rerum cognitionem. Non meta tua calliditas est, sed rerum veritas, quam debes addiscere. Absit arrogantia, nam loquar liberè de magno quodam philosopho, ejusque cultoribus. Aristoteles, et peripatetici omnes verum usum dialecticæ ideò ignorarunt, aut malitiosè et superbè deseruerunt, et magis ad addiscendam et exercendam astutiam hanc adhibuerunt, quam ad certam veramque doctrinam, et magis hac ipsa artes et scientias pervertunt, (uti ipse magnus magister tractavit physicam) quam docue-



docuerunt. Res nititur testimonio. Testantur hanc non anni, sed secula, scholarumque ingenia numerus, in quibus non solum hæc ars sed & tota philosophia nil aliud fuit, & adhuc est, nisi lis & verbosa contentio, & ne quid decedat auctoritati, pompa superaddita est negotio, leges sancitæ, promulgatæ, tabula affixa, verba in fronte: Sic quaeritur & invenitur veritas. Obedierunt cives, & rationem subjecerunt magno nomini. Repugnarunt quidam? ad Deum hujus doctrinæ provocavit Senatus aut ad idolum, ad diva quædam volumina, in quibus tamen multa falsa substituit superstitio, ex his addiscitur, ex his asseritur, ex his probatur, ex his formantur sermones, aut sermonum strepitus apud Græcos olim valdè familiares, uti Asclepius vetustissimus scriptor ad Regem Ammonem dicebat. verba ejus sunt: *Ἕλληνας, ὦ βασιλεῦ, λόγους ἔχουσιν αὐτὸς σπινθερίων, ἐνεργητικὸς δὲ, καὶ αὐτὸν ἐστὶν Ἑλλήνων φιλοσοφία λόγων φόρος.* Nam postquam sophistica illæ ex Thracia, Ciliciaque Græciam invasere ineptiæ, Epicuri atomi, ignis Heracliti, aqua Thaletis, Anaximenis spiritus, lis & amicitia Empedoclis, Diogenis dolium, & alia infinita Philosophorum, quæ inter se pugnant semper & concurrunt agmina, omnia verborum plena esse cœperunt, nihilque præter sophistarum sibilos inter se contententium audiverunt homines. Et hæc doctrina norma facta est, & regula omnium, opinioni fides tributa, secta condita, in qua nemo assumtus quamquam is bonus, qui pari docendi aut scribendi genere non uteretur, quod celebri contigit Homero, quem sic injuriosissimè ex numero philosophorum ejecerunt. Ast quis hic fuit? cum commodo dicetur. Vir fuit divinæ naturæ indole, judicio maximè exquisito, singulari rerum omnium præditus experientia, scrutator sedulus, & qui nihil intermisit, quo ad veram perveniret

D

scien-



scientiam. Ita Deorum consilia perspexit, hominum naturam, solis lumen, syderum choros, animalium generationem, refluxum maris gremium, fluviorum ostia, aëris diversitatem, civitatum negotia, domus curam, omnia quæ ad bellum pertinent & pacem, rusticos, equites, nautas, artes omnes, diversissima vocabula, diversas rerum species; lamentantes, gaudentes, lugentes, ridentes, irascen-  
tes, epulantes, ex quibus omnibus philosophiam conscripsit, quam dia sua nobis sistunt carmina. Duo etenim in hujus viri libris valdè sunt observanda, unum poësin spectat, & speciem habet fabulæ; alterum philosophiam, qua virtutem commendat & veritatem magnus sub poëte habitu philosophus, magni Platonis ductor, & doctor, qui dum Socratem proficitur, præceptorem Homerum sequitur, quæ vestigia ubique in illius libris apparent. Tam potens est opinionum imperium, & tam communis animi perversitas. Recognosce, sub quam injurioso veritas prematur domino.

## CAP. VIII.

**S**ed unum adhuc dicendum est, quod contentiones illas & dimicationes valdè reddit solemnes. Machina quædam arte paratur, ac in certas partes studiosè dispescitur, ut sub splendida forma bellum illud geratur, cui rei & magister præsidet, & adversarius se præparat & arietem conficit; qua alterum impetat, & illud quod affert, destruat, nec hic sine novo est subsidio. Nunc animosè res geritur, & confidenter, nemo vult cedere, nec putat se posse, aut debere. Sic tota consumitur dies, sub prandio congregiuntur, & post illud, sub coena, & post coenam, in urbe, in templo, in agro, in publico in privato, in omni loco, omni tempore existimantes, in hoc verti magnum



magnum decus, si ingeniosi credantur adversus veritatem, repertum esse artificiosum magnumque præsidium, & arma in quibus robur, quod satis superque sufficiat. In his & circa hæc omnem operam esse consumendam, non posse melius. Verum annon quoddam occurrit nomen, quo illa machina potest describi? Est illud in promptu, valdè frequens & probè notum, syllogismus vocatur, significans justam dispositionem trium enunciatorum, videlicet propositionis, assumptionis & complexionis, recti rationis processum, ubi denique concluditur rei veritas & essentia. Fateor, si moderatè ille adhibeatur, multum hoc modò, imprimis in scientiis popularibus, posse effici, ast dum naturam scrutamur, syllogismus sæpius succumbit, illaque elabitur è manibus, nam confusius agit, & fraudem in se habet multam. Nam quanquam hoc certum, & mathematicè quidè, illa omnia quæ in medio termino conveniunt, etiam inter se convenire, attamen quum rationis illud componatur ex propositionibus, propositiones ex verbis, verba autè ex notionibus, notiones verò sæpius à rebus temerè sint abstractæ & vage, nec satis definitæ & circumscriptæ, denique multis modis vitiosæ, tota structura facilè corrumpitur. Et dum laboramus, ut per examinationem consequentiarum, argumentorum, & propositionum rem in integrum restituamus, inaniter operam impendimus, nam in principiis hæret error, quem hoc modo haud possumus tollere. Et dum in ista doctrinæ forma verbis magis studium impenditur, quam rebus, quam plurimum & semper fermè transgreditur ad aliud negotium, quumque de re ipsa debeat tractari, disputatur de significatione vocabuli.

Quare quum per syllogismum, quemadmodum is communiter componitur, & adhibetur, veritatem rei vix pos-

D 2

simus



simus. aut difficulter admodum cognoscere, magisque methodum scholæ intendat, quam naturæ, alia demonstratione opus erit; & novo subsidio, videlicet inductione vera illa & emendata. Alia incendum via, quam illa vulgari, incerta & damnosa. Non à sensu & particularibus ad maximè generalia transeundum, utque ab illis cœtera per media deducantur, qui modus compendiosus est, & qui statim rem agit, sed præceptis & ad contentiones proclivis & paratus; alit ita procedendum, ut axiomata de gradu ad gradum enascantur, quæ rem ipsam contineant, & demum ad generalissimam benè terminata, naturæ cognita & insita perveniatur. Nec simplex enumeratio efficiet inductionem. res illa valde levis est & puerorum, qui precariò sic discunt concludere, & periculo, dum vel quis instat vel contradicit, se exponere. Graviori labore res indiget, experientia solvenda & separanda, & per exclusiones & rejectiones debitas concludendum. Concludere benè qui cupit, hoc novo & vero uti debet syllogismo.

## CAP. X.

AD hanc autem demonstrationem addiscendam major tibi est indicanda Dialectica, in qua apertè illam videas, & apprehendas, sicque instructus firmiori mente ratiocineris. Mathesis illa nominatur, veterum & puriorum philosophorum vera logica, ex omnibus artibus una & præcipua veri studiosa, quæ allicit, impellit, excitat, erigit, & mentem totam in rem convertit, iudicium acuit, & memoriam stabilit & confirmat, prima hominum scientia, in qua Sethus & Abrahamus in primis excellerunt, & ab hoc, uti Flavius Josephus, antiquitatum judaicarum scriptor refert, ex Assyria in Ægyptum translata, & ex Ægypto in Græciam, ubi summopere fuit ex-

cultæ.



culta; & magnum sapientum produxit numerum. Thales enim ibi floruit, Ameristus Mamertinus, Pythagoras, Anaxagoras, Oenopides Chius, Zenodotus, Hippocrates Chius mercator, qui quadraturam circuli, & duplicationem cubi tentavit & promovit, Briso, Antipho, Democritus, Theodorus Cyreneus, Plato Mathematicorum Deus, Leodamas Thasius, Architas Tarentinus, Theætetus Atheniensis, Neoclides, Leo, Eudoxus, Amyclas Heraclæotes, Dinostratus & Menechmus fratres, Theudius, Helicon Cyzicenus Atheniensis, Hermotimus Colophonius, Philippus Mendæus, Xenocrates, Theophrastus, Eudemus, Aristæus, Aristarchus, Euclides, Eratosthenes minor Plato dictus, Archimedes, Hipparchus, Apollonius Pergæus, Æneas Hieropolita, Amphinomus, Ctesibius Alexandrinus tonsor, inter rerum mirandarum artifices præcipuus, Hero mechanicus, Geminus, Perseus, Philolaus, Plotinus, Porphyrius, Plutarchus, Posidonius, Menelaus Alexandrinus, Sosigenes, Ptolemæus, Pappus, Philo, Diocles, Nicomedes, Sporus, Theodosius, Diophantus Algebrae scriptor, Nicomachus, Serenus, Proclus, Proclus mechanicus, Priscus, Diognetus Rhodius, & Theon, omnes amore veritatis incensi, simul videntes, quam multum hoc studium exercendæ & illustrandæ rationi immò aliis omnibus scientiis quoque conduceret. Persuade tibi hoc firmiter, utilem hanc scientiam esse & valde necessariam ab omnibus sapientiæ amatoribus adhibendam. Nam per istas solidas & veras demonstrationes non solum intellectui tuo magnum accedit lumen, sed & artes & scientiæ omnes, Theologia, Jurisprudentia, Politica, Medicina & tota Philosophia, immò, & res civiles perfectius cognoscuntur. Ideò ex illis quos enumeravi, Plato omnes suos libros mathematicis



ticis rationibus distinxit, neminē in Academiā admisit nisi Geometriæ peritum aut capacem, mundumque universum hoc studio, quum Deliacum duplicandi cubi problema proposuisset, incendit & inflammavit. Et ne te terreat hujus scientiæ latitudo, aut varietas, unâ Geometriâ utere, hac satis exercebis & confirmabis tuam dialecticâ.

## C. A P. XI. &amp; Ult.

**T**Andem ad efficiendū et perficiendum rectum ratiocinium, atque accuratius recognoscendum disciplina quædam requiritur, quæ notiones omnes, & cœteris communes investiget, observet, examinet, explicet, connectat, & ordinet, quam catholicam nomino, sapientiam universalem sive de ente, conclusionum ex primis principiis notitiam, scientiarum omnium parentem, nutricem, & magistram, alii metaphysicam, ontosophiam, philosophiam primam, aut artem naturalem. Et huic operam navâ, si nihil vis omittere, quod in te rectam efficiat perficiat & recognoscat rationem, & rectæ philosophiæ producat instrumentum. Nihil omittes, credo, nam ita generosus es, & proclivis ad virtutem, quæ semper sectatur perfectionem, quique semel divæ sapientiæ te dicasti, votum præsta integrum, in quo nihil deficiat. Victimam mutilam repudiat Numen. Non obstat rumor, quem dira spargit opinio, hanc esse errorum causam, tumultuum originem, periculosam, obscuram, intricatam, horridam, insulsam, ineptam; experientiam testem. At periculosa opinio, obscura, intricata, horrida, insulsa, inepta; experientia testis. Prodire vos malitiosi, et improvidi ad iudicium, evomitis mala, non dicitis. Quid fecit, quid commisit hæc sapientia? Audite, et diligentius, quæ dicentur, revolvite, adesse toti, mentem



rem purgate, ejicite ex hac deceptorem, discite sapere. Magna est stultitia innocentem accusare. Imputanda ista sunt discipulis, non disciplinæ, homini, non arti. Prostant scientiarum calamitates, spectantur quotidie. Immoderata ingenia omnes invaserunt crudeli & barbara audacia. Et hæc quam est ab illis mutata? Nunc mala, imò pessima quævis suspicio illam onerat, & admodum duriter. Oppressam videmus, & tanquam inutilem abjectam. Res magna auctoritate agitur. adstat sacer monitor, ne hanc amplius resumant homines, sine hac posse perveniri ad metam. Quæ injustitia? quod ab hominibus provenit, ex scientiis haustum esse dicitur. Verè Homerus Odysea prima:

Εἰς ἡμῶν γὰρ φασί τε καὶ ἔμμεναι οἱ δὲ καὶ αὐτοὶ

Σφῆσιν ἀπαδαλίαν ὑπὲρ μόνων ἄλγε' ἔχουσιν.

*Adscribunt superis homines mala, quum tamen ipsi  
Criminibus proprii sibi talia damna crearint.*

Quæ Maximus Tyrius Philosophus Platonius differtatione sua vigesima quinta, ubi ad illud: Unde sint mala, quum Deus bona faciat, responder, eruditè explicavit. sequar ejus verba, nam proba sunt, & consideratè composita. Quæ est ergò improbitatis hujus causa? quis fons? quænam origo? an ex Æthiopia cum peste? aut Babylo-  
ne cum Xerxe? aut ex Macedonia cum Philippo? Non enim è cœlo, me Hercules, non è cœlo. exulat enim ibi invidia. Bonum è cœlo, mala verò à mundo. Ergo, si quædam in terris minus quam oportebat, sint constituta, & aliquid admittatur ab arte alienum, cave, in causa esse dicas artem, liberanda ab hac culpâ illa est, & illorum corrigenda malitia aut negligentia, qui terminum modestiæ excedunt. Scientia omnis in se bona est, animus verò malus, qui illam commaculat, turbat, & pervertit. Tu  
confi-



confidenter illam, quam mox tibi commendavi, arripe, & rem, quam providè inchoasti, perfice. Crede, hanc tibi fore maxime utilem, nec sine hujus subsidio te unquam ad verum perventurum. Et ut te magis in hanc sententiam adducam, recitabo ego ejus virtutem, quæ multa est, & varia. Primò ad fundamentum te ducit omnis rationationis & syllogismi, hoc est, ad axioma, *ens est*, in quod principium omnem conclusionem resolvere debes, & reducere, docetque hoc artificium, omnem multitudinem revocandam esse ad unitatem. Ita quoque te instruit de verò terminorum axiomatum & enunciatorum intellectu, & genuino sensu, & quomodo omnium rerum dignitas & perfectio sit dijudicanda; quomodo abstrahenda, & distinguenda sint illa, quæ in uno eodemque objecto sunt conjuncta, aut tantum formâ, aut re ipsâ distincta. Pari modo tibi arma largitur, ut contra otiosarum quarundam & excogitarum distinctionum insultum te possis defendere, & adversarium retrudere, imò dejicere. Cautum quoque te efficit, ne te seducat distinctionum externa species, neque putes unamquamvis statim reale inferre discrimen. Ita rerum definitiones docet conficere, & tam proxima genera, quam differentias suppeditat, & dum congerere cupis quoddam cornu topiæ, ordinem tibi monstrat, totumque disponit, & dum scribis quoque aut differis, parem navat tibi operam. Ast non tibi solum, sed & reliquis disciplinis inservit, subjecta siquidem illis rogata præscribit, et adsignat, constituit et discernit, atque ad inveniendâ illorum attributa viam monstrat, utque in multis inferioribus scientiis hæc explicentur, ordinem legitimum et uniformem, et ut convenienter digerantur. Omnes insuper disciplinas inter se unit, litesque dirimit ac tollit, et ut hujus ductu multa paucis complectar, liberat



## PHILOSOPHIA.

33

berat te ab ignorantia, & veram magnamque tibi parit scientiam. Hanc ama et venerare, quæ te rectum efficit Philosophum, et perficit:

## LIBER II.

### CAPUT I.

**N**unc plenius hoc novo sermone, quo totam rem absolvam, de Philosophia es informandus, & ne tibi, dum de una materia tam multum loquor, tædiosus fiam, aut odiosus, firmiter tibi imprime, philosophiam scientiam esse, sine qua ne minimam partem nostræ vitæ benè transigere possumus. hanc si deserimus, bonum illud, quod benigniter, & ad necessitatem nobis datum est, nefariè rejicimus. hæc omni tempore, & ubique requiritur. Examinemus omnem mortalium aetatem, felix hæc fuit, dum illam coluit, infelix sine illa, fera & barbara, nec ulla hominum communio magis civilis, aut polita, quam ubi philosophantur homines. confusa verò quædam est, & intricata? inquiramus in causam, & videbimus neglectam ibi fuisse Philosophiam. in justum ordinem reponenda? advocanda illa est in consilium, quæ ad petitionem parata suggerit, quod volunt, & liberaliter quidem, nam rem quoque præstat ipsa vera sapientia, quæ non solum docet, sed etiam operatur quam diligentissimè.

Sed huic laudi repugnare videntur quædam, quæ scrupulum tibi injiciunt omni cura eximendum. Ponderosus is est, & ejus valoris, qui non ita absolutè potest reprehendi. Christianus es, religionem tuam vehementer, uti par est, æstimas, & veneraris, foedus illud animæ tuæ, quod cum Deo hæc pepigit. Sacram habes cautionem

E

primi-



primitus Colossensibus datam, circumpsectum te debere esse & cautum, philosophiam seducere; accedunt ecclesiæ doctores venerandi, & sapientes, qui sanctum oraculum dilucidè explicant, & philosophum à Christiano sollicitè distinguunt. Tertullianus presbyter Carthaginensis, qui vicinus vixit divorum Apostolorum temporibus, vir omnium disciplinarum exactè peritus, & in arcanis literis nulli secundus, in apologetico suo, quem adversus gentes scripsit ita differit: Quid adeò simile Philosophus, & Christianus? Græciæ discipulus, & coeli? famæ negotiator, & vitæ? verborum & factorum operator? rerum aedificator, & destructor? amicus & inimicus erroris? veritatis interpolator, & expressor? furator ejus & custos antiquior omnibus nî fallor? & Aurelius Augustinus Hipponensem episcopus, homo ingenii ardentissimi, nec in theologia solum, sed in philosophia quoque excellens, hanc adeò deprimit, ut libro tertio contra Academicos asserat, solum Christianismum veram esse philosophiam. Imò res acerbius acta, pronunciatum, philosophorum ingenia omni hæresi animam indere & vitam, philosophos hæreticorum esse patriarchas, uti ille, quem primò allegavi, Auctor libro adversus Hermogenem verbis fecit perspicuis, atque philosophiam Thebani, Spartiati & Argivi non sine causa ejecerunt. Constat ergò, mala multa ab hac profluxisse.

Res gestæ ita sunt. historiæ credimus. Sed quid inde? an philosophiæ ideò renunciandum? si fieret, animum levem dicerem & sordidum, qui ultra non sapere cupit, quam ubi humi repunt ista verba. An culpandus ideò Deus est, averruncet is à me omnem blasphemiam, quum tam injuriosè de ejus majestate loquantur homines? an ideò relinquendus verus ille? quum tot fingantur, & fabri-

bri-



abricentur falsi? an verus ejus prohibendus est cultus, quum tot sint infidi veneratores, & hypocritæ? Recte ne idè est accusanda religio, quum tot sint profani templi ingressores, quorum maxima parte totum est repletum? Recta philosophia, modesta illa, quamque heic præscribo, non adversatur religioni, nam intra circulum suum se continet. hæc proba est continentia, optima virtus, ob quã philosophus non solum laudatur, sed & Christianus. Verum differunt hi duo valdè, dicis, audivi mox discrimen. Concedo, perversum philosophum, & bonum christianum, qui dum aliquando à sua bonitate deficit, pejor est malo philosopho. Sic veram profiteris philosophiam solus christianus, si solummodò fides in mundo requiretur, non eruditio, semperque in templo vivendum esset, non etiam in Academia, inter artium atque scientiarum doctrinam, nec amplius ab homine regendus mundus. Sed excitat sectas, hæreses, & magna schismata, dicis porro, accusa improba hominum studia, illorumque imprudentiam. Cur tam libidinosè à vero aberrarunt tramite? cur sobrius qui debuit esse fuit ebrius? an vinum accusabis divinum illum potum? minimè. Et moverunt philosophi de sancta tua fide contentiones, scias velim, alios itidem philosophos easdem repressisse. Ita Marcion impetivit veritatem, Tertullianus confecit hostem, Celsus blasphemias evomuit in mundi servatorem, Origenes ex illis illustravit hujus gloriam; Libanius idolatriam docuit, Chrysostomus verum Dei cultum; & Symmachus idem fecit, quod Libanius, Prudentius hunc confodit; Valentinus opugnavit ecclesiam, Justinus, & Irenæus hanc defenderunt. Ejecerunt homines philosophiam ex sua civitate? malignè fecerunt: ejicienda sunt



insipientia, superbia, luxuries, stupra, adulteria, iniustitia, & omnis mala concupiscentia. Non à philosophia proveniunt mala, sed ab imprudentia.

## CAP. II.

VIdes, quam temera hominum sint judicia, & quam sinistrè dicta interpretentur, atque ad omnia detorquenda ingenia se comparent. fontes cum innocentibus pares illis sunt, quod unus commisit, omnibus id imputatur, iniusti causam & in se cogitur sumere justus. Collige, quantam philosophia per tot mundi ætates sustinuerit injuriam. Injuriosam vocarunt injuriosi, vitia illi affinxerunt foedissima foedissimi, & nulla majora ullibi reperire potuerunt, quam in hac ipsa. In consuetudinem abiit sermo unius diei, & quam unus tunc saltem reprehendit, nunc universus hominum cœtus accusat & contemnit, nec divinæ causæ actores erubescunt hanc proscindere convitiis. Omnes quicumque hoc faciunt, si rectam quævisissent, mentemque suam abduxissent ab hoc pessimo negotio, sibi ipsis redditi ad meliorem faciliè pervenissent sententiam. Cunctis, quæcunque ad rectam pertinent philosophiam, à longo tempore hæc superinducta est facies, commaculata & corrupta, & in hoc mundi senio conciliata illi gravitas, sanctaque veneratio, et veneranda meritò dicitur canities, modo hæc non ita larga et irridenda, nam ad pueritiam recidit, et mentis defectum. Inveterata opinio est, accusare philosophiam. Sed non omne verum quod antiquum. Mitius procedendum, beati sunt lenes. Aberro à via? non sum castigandus, quod errem; accidit enim hoc quotidie à primo primi hominis lapsu humanitus, sed placidè sum informandus, ira disturbat, et fideliter deducendus in rectam. Sunt tanti homi-



hominum etrores, qui ad veram pervenire cupiunt sapientiam? non percutiendi errantes sunt, sed instruendi. desipiunt? non sapientia vocanda stultitia, nam nondum tetigerunt metam. Spectamus multos homines, qui ad sanctam tendunt civitatem, qui dum naturam mali sunt in itinere quoque corrumpuntur, an hanc ob causam sancta illa vocanda mala? neutiquam. Philosophia fuit, est, & erit semper vera sapientia, primum & precipuum vitae nostrae condimentum, quo civitatis praeses, animae curator, justitiae patronus, corporis conservator, doctrinae antistes, & omnes illi, qui recte cupiunt ratiocinari, necessario utuntur. Perspicacius loquar, nam forsitan ex me vis cognoscere, quid sit philosophia proprie, & in quo consistat. Variè hæc definitur, sed perfectè nequit, non enim hæc una est disciplina, aut habitus. Antiqui multum in producenda aliqua laborarunt, & tandem hanc confecerunt, videlicet, Philosophiam esse nil aliud, nisi accuratam divinarum, & humanarum rerum scientiam, quam Maximus Tyrius, priori libro quoque à me adhibitus, dissertatione sua decima sexta, qua de hoc, an secundum Homerum definita sit in Philosophia opinio, agit, consignavit. Significarunt illi hanc esse quandam cognitionem, & illarum rerum, quæ extra nos causas suas habent, cur sint vel fiant, & illarum, quæ ut sint vel fiant ex nostro arbitrio, & potestate pendet, ex principiis, quæ per se nota sunt, naturalis intellectus lumine collectam.

Sed nondum hæc adeò clara sunt, ut ulteriori non indigeant interpretatione. Augebo ego illorum verborum mentem, & dilucidius de philosophiæ natura dicam. Deum immiscebo, nam hic esse debet in omnibus. Cognoscenda ejus majestas & heic, uti ibi solet cognosci, ubi

E 3.

cœlestis



coelestis nos informat revelatio. Non una Dei est cognitio. Una divina & spiritualis, altera humana aut naturalis. ex illa Theologia quædam facta, quam sacri constituunt libri, ex quibus illa depromitur, & confirmatur divini spiritus testimonio, ex hac vero nascitur quædam, quam natura universi suggerit, quam cœli enarrant, nam

OTPAHO AHO OTPAHO KAOO ACTPA AHO

ACTPA KAOO TATTA KATAAAE KE ETXXHC.

Coelum est supra, coelum est infra, astra supra, & astra infra, hæc comprehendere, & prosperabere, sic dicunt Ægyptii, quam dies annunciat dici, & nox nocti quamque appello philosophiam, scientiam naturalem de Deo, & talem hujus cultum, quæ servus Dei fidelis & doctus Paulus in litteris suis, quas ad Romanos scripsit, manifesta esse in hominibus naturâ, docet, & simul asserit, occulta Dei à fundamentis mundi in creaturis per intellectum conspici, & virtutem ejus & divinitatem in æternum. Quemadmodum ergo Deus secundum naturæ lumen extra sacram istam revelationem cognoscitur, & juxta naturæ legem quoque colitur, cujus rei veritas ampla valde est, certa & evidens, ita quædam est disciplina, quæ hanc cognitionem, & hunc cultum hominibus proponit, & bono ordine imprimit. Ordo requiritur, nam tam magna hæc est, & diffusa. Ad sis, precor, mecum toti rei sedulus observator. Primò hauritur hæc Dei cognitio ex illis rebus, quæ possunt videri, & conspici, datur itaque naturalis quædam ita nominata, quæ docet, & interpretatur corporum naturalium principia, affectiones & species, qua ratione philosophi ethnici ex rerum motu pervenerunt ad primum motorem. Deinde quum Deus non tantum ita sit cognoscendus, sed etiam colendus, mores consignat hæc disciplina, & virtutum aperit seminarium, in quo



in quo prudentes fiant, & discant in hac vita naturæ viribus benè & beatè vivere. Denique quum nec naturalis illa, nec hæc moralis disciplina ritè possit agere, nisi à ratione humana dirigantur, hæcque corrupta sit, & ad errorem proclivis & facilis, addenda illa est, quæ hanc emendet, regat, atque ordinet, vocata ideò rationalis.

Hæc ergo philosophiam constituere, & his partibus illam absolvi, non inconueniens docet argumentum, sed certum, & ex ipsius rei medullis extractum. Quæcunque enim natura omnium, tam diuinorum, quam humanorum (alia non dantur) in se habet, hæc comprehendit disciplina, hoc ordine, quem illa monstrat & docet, atque cui semper tam sine fraude, quam negligentia adhæret recta, & indubitata. Et in parte illa, quæ naturalis appellatur, ne aliquid omissum esse videatur, subtilius quod est, & in sublimiori locatum gradu, metaphysicorum meritò huc referemus doctrinam, quorum labor physici semper requirit scholam. Simili modò supplebunt moralem illa, quæ iustitiam concernunt strictiorem tam erga Deum, quam homines, & clariorem, quæ societatem regunt, & conservant, corpus hominum tuentur, sanitatem custodiunt, aut amissam restituunt, animum & linguam poliunt. nec minor cura rationali adhibebitur, quam matheſis exercebit & confirmabit. Patet nunc amplitudo philosophiæ; ejusque dignitas, quæ ubique observanda, nam in omni est loco. Hanc totam disce, Homo, ne quid tibi desit, quum te consulent homines Philosophum.



## CAP. III.

**D**efinivi philosophiam, & illam divisi, utrumque feci, uti bene existimo, ex rei veritate, quæ ulterius se offert, & principia hujus philosophiæ suggerit, & recommendat. Recta philosophia recta illa habet, & ex quibus cætera fluunt ejusdem bonitatis. Sic bene consulitur rebus, quando initia firma sunt, & attacta, ipsi insident quoque & insunt. Faciamus periculum, feliciter succedet id, quod conabimur. Mirum videtur esse, & novum, ingratum & contra vulgarem opinionem, hæc enarrare. Obstabunt multi, sed prudenter hoc declinandum erit obstaculum. Placide occurrendum furori, informandusque leniter obmurmurator, qui ad cognoscendam causam humaniter invitandus est, & ducendus. Res significanda. Titubamus, vacillamus, et mox stabimus. Audi vic principia meæ philosophiæ? inquires. Maximè audivisti illa. Dubitandum est de omnibus, sed semel tantum in tota tua vita, et ita pervenies ad rerum veritatem, quam unice sectaris Philosophus. Dubitabis, non ut semper dubites, sed ut hæc dubitatio te liberet ab omnibus illis, quæ à prima pueritia te circumfident, malis. Infantes nascimur, et variè de rebus, quæ sensu possunt percipi, judicavimus. Non integrum tum rationis habuimus usum, & immaturi fuimus iudices. Dubitabis itaque, & contemplator tantum, de iis omnibus, in quibus vel minimam putas esse incertitudinem, hæcque & falsa esse existimabis, ut eò apertius certissima omnia, & cognitioni pervia invenias. Dubitabis an aliquid, quod sentire potes, et tibi imaginari, existat, nec sine ratione, nam sensus interdum errant, & imaginationes admodum sunt fallaces. Dubitabis quoque de illis, quæ antea maximè  
certa



certa esse judicabas, et ne te decipiant illa, quæ per se nota esse putabas, mathematicorum dubitationes quoque vocabis in dubium, quia vides, quosdam in his etiam errasse, & potentissimum quoddam esse numen, quod omnia potest. Ignoras enim an te hoc forsitan ita fecerit, ut semper fallaris, & in illis quoque, quorum notitiam tibi maximè acquisivisti claram et lucidam. Tam cautus esse potes sine injuria. Et finge, te esse à te ipso, vel à quodam alio minus potenti, eò magis credes, te esse imperfectum & fraudi subditum. Ne verò in errorem procidas ita dubius & incertus, divinitus contra hoc tibi datum est remedium, arbitrium liberum, & voluntas, ob quam te laudant homines, & vituperant. Duo enim in te sunt, quemadmodum in omnibus, quæ ad judicandum requiruntur, intelligere nempe, & velle. Voluntas ampla est, & multo major intellectu. Ab illa proveniunt errores, qui quidem non sunt in tua natura, sed in actione, quæ sæpius deficit. Nam quis unquam voluit falli? nemo sane. Sed multi voluerunt assentiri iis, in quibus error latet, quam illi ignorarunt.

Hanc ob causam penetrandum tibi est hac dubitatione ad interiora & primam rerum sedem, ibique omnia ita consideranda, ut clarè & distinctè illa percipias, hisque solis assentiaris. Nam ita nunquam falsum pro vero admittes. Deus verax est, qui te creavit, & facultas percipiendi, quam tibi indidit, verum amat, & assensus claritatem, quæque naturæ ita impressa sunt, ut quoties aliquid clarè percipis, ei assentiaris lubenter, & sine dubitatione. Clarè percepta te trahunt in assensum, qui, si credit non ita perceptis, te seducit, falleris, & erras ignorans errorem, aut casu incidis in veritatem. Quare rarò iis assentiri solent homines, quæ non

F

per-



perceperunt, naturæ namque humanæ magnus est splendor, qui mentem illustrat, & docet de re incognita non esse judicandum. Opinio autem inveterata, & quæ tam mirè se ingenio hominum insinuat, totam mentem occupat, & tanta dulcedine illam occæcat, ut hæc putet, se multa percepisse, quæ nunquam percepit, quibus assentitur, & certa, & vera esse nullo modo amplius dubitat. Accedit ignorantia illorum, quæ, ut omnia rectè percipiantur, requiruntur. Nil omittendum. Pervenies facile ad intelligendam rerum veritatem, si totam modò adhibueris viam. Putas sufficere, clarum esse tuum intellectum, erras; nam distinctus quoque ille esse debet. Perpende hæc duo, pervenies felix ad veritatem. Clarus is esse debet & perspicuus, utque menti, quæ attendit, præsens sit, & apertus, integer, sine ullo impedimento, aut fuco, ut percipiat purè & uti in se sunt, quemadmodum oculus intuetur præsentia apertè, & fortiter. Distinctus quoque sit, ut ab omnibus aliis ita se jungatur, quò nihil, quam quod clarum est, in se contineat, cujus defectum ex prima nostra ætate ad nos transire videmus sæpius, ubi clarè multa, sed non distinctè percepimus. Dubitandum itaque est, causâ in promptu.

## CAP. II II.

POSTquam ita de omnibus rebus dubitasti, necessu est, ut sedulò inquiras, annon aliquid sit in hoc universo, quod adeò certum, ut de illo minimè possit dubitari. Observa cognoscendi ordinem, & à tui cognitione inchoa, nam ita decet, & hoc naturæ admodum est consentaneum. Quid primò se intellectui offert? intellectus ipse. Quid mens humana primò cognoscit? sanè suam actionem, & post hanc illud, circa quod illa versatur. Cogitas, inquiris, dubi-

tas.



tas, ergò es. & quamvis fallaris, & erres, attamen certum hoc manet, imò certissimum, te esse. Dubitas de certa omnium rerum existentia, sed de tua certissima non potes dubitare, & quò magis de aliis omnibus dubitas, eò de tui ipsius existentia sis certior. Sequuntur hæc certè, Nam fieri non potest, ut id quod cogitat, inquirat, dubitat, dum cogitat, inquirat, dubitat, non sit. Atque hæc prima illa est veritas, qua rem aliquam esse firmiter, sine hæsitazione, & invictè probatur. Nihil nunc habetur pro vero nisi certissimè demonstratum, & cujus evidentia apertissima.

Sed annon possum concludere, eloquor, ambulo, video, ergò sum? Hæc conclusio non est certa, nec absoluta, aut vera, quia certa rei existentia non potest inferri ex medio incerto, vel incertæ existentia. Nam quia sæpè non loqueris, non vides, nec linguam, nec pedes, nec oculos moves, dubitare de illis maximè potest. At dubitare planè nequis, an cogites dum inquiris, & dubitas, quia existimans & dubitas te inquirere, cogitas. Hæc agis certè, qui certè existis. Quid ergò certum, & verum, imò certissimum verissimumque? hoc, te cogitare, inquirere, dubitare, & te verè existere. Hac de causa philosophus eximitur longiori dubitationi certissima hac instructus veritate, & ad certiores, verioresque sententias viam videt. Sic certus nunc maximè es de illo, quod existas. progredere tali modo, melior non datur, invenisti verum, utè illo. Inquire porrò, quis sis? esne homo? est ita. esne animal rationale? maximè. Sed altioris sunt indaginis examinare hæc tota, quæ difficultatem in se habent, & versutarum quæstionum prognerare solent magnum numerum, è quibus nascuntur multa incommoda. Simplius tu hanc teres viam, & quid spontè solâ natura indice



tibi obvenerit, considerabis. Præteritas advocabis cogitationes. Annon inquisivisti antehac, quid esses? quid inveniebas? caput, pectus, manus, brachia, pedes, totumque corpus, & quid ulterius? te nutriri, incedere, cogitare, animam in te esse, & varia tibi de hac imaginaberis. Revolve hæc tecum nunc diligentissimè, dubita de illis omnibus, & postea corpus & animam, ex quibus duobus tu homo es compositus, describe, atque illa, quæ forsitan dubia manent, remove, hoc unum iterum videbis certissimum, te esse rem quandam, quæ cogitat. Sed excitatus nunc valdè es, vis plura cognoscere, imaginari tibi rursus varia, quæ tamen ad te non pertinere factò illo examine facilè animadvertis. Rem ergò tentabis aliter, imaginationem tanquam incertum doctorem deferens, & illa tantùm curabis, quæ solo intellectu possunt percipi, ut eò distinctius naturam tuam addiscas. & quid sic addisces? te esse rem, quæ dubitat, intelligit, vult, renuit, affirmat, negat, imaginatur, sentit. Et ne iterum, quum novus adhuc sis in Philosophia, & negotio non asvetus, in hanc opinionem procidas, ac si illa, quæ sensibus percipere potes, melius cognoscas, fallaciam horum proba, multa enim sunt, quæ omnibus tuis sensibus posse percipi putas, quum tamen, si accuratius inquiras, à nullo percipiantur, sed solo intellectu. Hoc te cognosce. Sed quomodo te vocabo? jam nomen geres. vocabo te mentem. Scis nunc quid sis, & quid. Hæc tui cognitio fundamentum esto aliorum. Tende ulterius. Creatoris tui non obliviscere. ordine philosophare. Scala posita est, ascende ad illum, mente cognoscitur. Descende rursus, quum illum cognoveris, ad opera manuum ejus quæ sub ejus pedibus, maximum heic dabitur menti tuæ exercitium.



## CAP. V.

VERUM ne existimes, nos solum sapere, atque hanc optimam viam ad indagandam, & obtinendam veritatem inuenisse, hocque novum quiddam esse, sed periculosum, durumque et difficile, longam oppugnare consuetudinem, duos magnos tibi producam viros, et, quum multi præter hos quoque hujus sententiæ fuerint patroni, eminentes. unus vetustus est, alter recens. Uterque celebris. Ille Aristoteles est, summus philosophus acutissimi ingenii, φιλοπονώτατος, εὐσεβειώτατος, καὶ ἀντιστοχαστικώτατος, & qui per tot sæcula norma doctrinæ, quanquam injustè, fuit & regula. Hic ipse vir tantæ auctoritatis non solum docet, sed etiam mandat dubitationem esse debere initium rectæ philosophiæ, veræque & indubitatae scientiæ. Nos hac vice latinam interpretationem Bessarionis Cardinalis Nicensi, & Patriarchæ Constantinopolitani sequemur. Locus in Aristotelis libro tertio Metaphysicorum habetur. Sed quid profitetur hic doctor? recitabo verba. Ad illam, quæ quæritur, scientiam necesse est, primum nos percurrere, de quibus primò est dubitandum. Hæc autem sunt, & quæcunque de iis aliter quidam existimarunt, & si quid ultra hæc prætermisum sit. Est autem operæ pretium, aliquid facultatis habere volentibus, benè dubitare: nam posterior facultas solutio est eorum, quæ ante dubitata fuerunt. Solvere autem non est, quum nodus ignoratur, sed intellectus hæsitatio manifestum hoc de re facit. Quatenus enim dubitat, eatenus simile quiddam ligatis patitur, nam utroque modo impossibile est ad ulteriora procedere. Quare omnes primò difficultates speculari par est, et horum gratia, et propterea, quod illi quærunt, nisi primò dubitent, similes sint illis, qui, quonam ire oporteat,



teat, ignorant, & hæc, neque utrum invenerint, quod  
quæritur, an non, cognoscere possunt. Finis etenim his  
quidem non est manifestus; illi autem, qui antea dubita-  
vit, is patescit, et melius sese habet ille, uti necessum est,  
ad judicandum qui tanquam adversarios omnes utrinque  
rationes audit. Apertè satis loquitur Græcus, et firmiter  
sententiam protulit, quam ipso opere comprobavit, licet  
animo immoderato nonnunquâ, qui sibi interdum magis  
studuit, quam rebus, quas unicè tractare debuisset. Sed  
illius sententiæ vestigia in variis libris, quos ille conscrip-  
sit, conspicimus, præcipuè autem in illius problematibus,  
in quibus nobile particularium dubitationum continetur  
exemplum, quæ non solum à posteris semper laudanda,  
sed & continuanda. Imò Franciscus Patricius Philoso-  
phus Romanus, quo viro nemo unquam Aristotelis vo-  
lumina diligentius ac accuratius perlegit, in Discussioni-  
bus suis peripateticis libro undecimo tomi primi testatur,  
dubitationes, uti & adhuc quatuor, nempe propositio-  
nem, & expositionem rei, antiquarum opinionum, ratio-  
numque confutationem, dogmatum suorum constitutio-  
nes, & epilogos, quibus, acta commemoret, reperiri in  
omnibus ejus libris. Et quam probè coluerunt hanc do-  
ctrinam interpretes, fideliter illam adhibuerunt & conser-  
varunt tanquam rectam regulam perveniendi ad rerum  
veritatem. Quam ob rem allegantur inter Græcos Alexan-  
der Aphrodisiænsis, inter Arabes Avenroës magnus Com-  
mentator, inter Latinos Thomas Aquinas, Joannes  
Duns Scotus, Antonius Scainus Salodiensis quoque,  
Complutenses, Conimbricenses, Fonsæca, Ruvius, Ma-  
sius, Toletus, Paulus Sonzinius, Javellus, Duvallius,  
qui omnes hanc viam sunt ingressi. Vides ergò, non esse  
novam doctrinam, quæ mandet dubitandum prius esse de  
omni-



omnibus rebus, quam possint cognosci. & si sectatorum desideras numerum, habes heic magnum.

Indicavi tibi sic primum dubitationis philosophicæ autorem. sequitur nunc alter, qui hoc floruit seculo, meritò inter veros veræ philosophiæ restauratores numerandus, Renatus Cartesius, fatale planè ingenium, homo potentissimi ingenii, veræ & intermortuæ sapientiæ phosphorus, vindex & adsertor, qui intrepidè & post longam deliberationem omniumque rerum providum examen, dubitationem itidem philosophiæ suggerit indubitatum principium, quo ritè adhibito cætera felicissimè superstruuntur. Desideras & hujus scire imitatores, non caret discipulis doctor, sparsi sunt per orbem, res suas hoc modò tractant prudenter. Faciunt hoc Theologi, & illorū sermo certus est & evidens, decenter compositus. Sequuntur hanc doctrinam Juris Consulti, stant inconcussi, verba ab imo usque ad summum diligenter sunt ordinata. Utuntur hac medici, & confidenter naturæ consultitur. Philosophare hoc modo, vetustus is est, & innovatus, veros sequere doctores, certi hi sunt, & qui omnia sedulò demonstrant: non solus es in hac via, sed multi tecum. At si videris alibi copiosorem adversæ sententiæ scholam, cogita, pauciores bonos meliores esse perversâ multitudine.

## C A P. VI. &amp; Ult.

**I**Deò hæc dubitatio ita debet institui ut sit utilis. Non dubitas, ut dubites, sed ut ad certum & verum pertingas, ut philosophiam munias contra errores; nam magnæ est prudentiæ, illud quod non planè liquet, suspendere, ut post novū examen & providam deliberationē judicetur. Semel dubitabis tantum, ne ex una dubitatione oriatur alia, totaque admittatur, & quasi authentica, & omnia  
incer-




incertis opinionibus repleantur, & de schola in scholam transvehantur, unde contentiosi illi originem ducunt, qui hanc stirpem suam perpetuam facere volunt & validam. Sed contemplationis & acritatis intempestivè gloriam venantes retardant loquaciter & superfluè dicentes, semper aliquid addubitantes non necessariorum, & requirentes demonstrationes rerum, quæ iis non egent. Sic via brevis fit longa, ut ait Sophocles, non sibi solum, sed aliis etiam. Dum enim apprehendunt in singulis rebus doctorem, vanis & superfluis interrogationibus veluti in trivio impediunt disciplinæ cursum, quia sic stationes quasdam & remoras accipit. Isti quidem secundum Hieronymum, peripateticum antiquissimum, sunt veluti timidi ac gulosi canes, qui coria domi mordent & pilos vellicant, ipsas verò feras non attingunt. Tu dubita prudenter, & finem scito esse imponendam huic licentiæ. Satis hac vice tecum sum locutus. Proximè, tractabimus ipsa rectæ philosophiæ mysteria.


F I N I S.




Z. 1. 1. 15

















005644063

16